

Jü Carta San Pablota Guosa Huëpo Jïojtekähui Corintiommehui

Teboteri

1 ¹Ínapo, Pablo, Diosta eä pámani, Jesucristotau apóstol, áapo nee äbo bíttuak, jü hermano Timoteotamak, jume Cristota sualhuäpo nau anim buere joära Corintiempo jometaune jïojte, entok síme jume Cristota sualhuäpo nau anim buiära Acayapo jomemmaki. ²Yanti ehuame entok Diosta tü eähui enchimmaktunake, jü Dios itom Átchay entok Señor Jesucristota bétana.

Pablota jïokot au inneähui

³Jü Diospo tü eri Dios áchayta béchïbo entok ä üusihua itom Señor Jesucristota béchïbo, bueítuk nak jïokolihuäpo Achayri entok jíapsi yejtehuäpo Dios. ⁴Íri áapo jïokot anhuäpo itom jíapsi yechame, bueítuk ínëli kétchi itapo huatemte ára jíapsi yechanake jachin jïokot bem anëpo junne jum itom jíapsi yechahuaka pámani, Diosta itom jíapsi yechakä Bénasi. ⁵Bueítuk jachin jü Cristota béchïbo jïokot anhuame yún itot ä ayuka Bénasi,

anëli kétchi jü Cristota itom jíapsi yechähui juebenna. ⁶Të, itapo jïokot ito bichätek, jíapsi joahuakate jinëuna; entok itapo Áapörík bétana jíapsi joahuätek, jinëuriata entok jíapsi jotehuamta enchim jipunakë béchïbo, ïri jïokot anhuame imï yeu huéiye ïri jíba ajäria jü jïokot anhuaka itou ket hueme. ⁷Entok jü itom boobichäu enchim bétana huitti huéiye, bueítuk jüniate itomak jïokot enchim anëhui, entok kétchi jum jíapsi jotehuäpo itomakem kaate.

⁸Hermanom, enchimte ä jüneria-ïa juka buiära Ásiapo jïokot itou síkamta; tüisi namuksi itou síka itom úttia béppa, íkai itou hue násukte kaa jíapsaka áma ito yeu katmachiley.

⁹Bueítukte béja itom suabahuaiite boobíchaihuiy, ïri ínëli itou síka itom úttiärat kaa itom enakë béchïbo, ál-la Diostachi, jü kókkolam ára jiabitetuame.

¹⁰Áapo itom áma yeu sakatuak, entok jíba áma itom yeu kattua, jum buere jinhua machiku kókkohuäpo. Entokte at boobíchaihui itom ä úhuanakë béchïbo juka

kókkko huamta, ¹¹ inëlem ket emeë itom aniäteko oraciónim joakari ito béchïbo. Bueituk imëri juebénakam ket ito béchïbo Diostau buanäteko, juebénakam ket Diosta baisesunake juka Diosta tü eäu itom mabetakä béchïbo.

Jachiakasu Pablo kaa pueblo Corintiou siika

¹² Bueituk ïri ajäria jü ujoyória itom bíchakähui, jü itom naa kujaktepo huatem täyähui itom jiápsipo tüisi huéiye, ïri kaa emo buerialihuäpo ál-la huitti Dióstamak jiápsihuäpo. Kaa jume yoremem jita täyapo ál-la Diosta tü ehuäpo, inëlite ániat ito bojória, entok chë junne enchimmaki. ¹³ Bueitukte kaa huatek enchimneu jiojte, juka huatek enchim nooka násuk at jünéaka juka huatek nokaka enchim at jünéapo. Tene ä boobíchaïhui ä chupëpo enchim at jüneenakëhui, ¹⁴ bueituk huatek huämem at jüneela, itom enchim ujoyóriatukähui anëli kéchi itapote ujoyóriapo enchim jipure, huäri taahuarit Señor Jesússta yepsäpo.

¹⁵ Íkai huitti ehuamta jipurekane, bat enchimneu huebabarek, bueituk guosa huëpo Diosta tühua enchim jipunakë béchbo; ¹⁶ Macedonia buiärau bíchaa huepatne enchimneu bat noitibare, chúkula entok, Macedonia bétana nottilataka, huetek júchine enchimneu yebijnake. Huanai chúkula emëe nee böo toijnake Judea buiärau bícha. ¹⁷ ¿Jáamakne íkai yáa báreka kaa tüisi ä yauhuak kaa

tüisi at suaka namuksi ino ä yáaka béchïbo? ¿Entok ínëli jü ín yáa bareka eähui jáamak yorem ehuäpo huéiye, bueituk ínëli jü guosa ehuame inot ayunake jü ínel jiahuame “jehui” entok “ëe”? ¹⁸ Të Dios huitti ehuamta attiak jü enchimneu itom nokaü entok, kaa “jehui” entok kaa “ëe”. ¹⁹ Bueituk jü Diosta Üusi, Jesucristo, enchim násuk ito bétana nokhuakame, ino bétana, Silvanota bétana, entok Timoteota bétana, kaa “ëe” entok “jehui” ti jiaubahuäpo nok-ri; ál-la jehui ti jiaupo taahua, áapöríkuchi; ²⁰ bueituk jü síme Diosta itom mak-rokau, áapörícut chuppe. Huari béchïbo, jü símek béppa ujoyória Diostat bínna, entokte ínel jiaunake “Júnentunake” Cristo Jesússta huämi. ²¹ Áapo juka huitti ehuamta itom makka Cristotamaki, entok juka Diosta bétana tékilta yáa ïahuaka yeu puahuamta. ²² Áapo itom seeyotuaka entok juka Espíritu Santota chúkula itom mabetnakëu ä lüturiatukähui jiápsipo itom ä makkak.

²³ Tene ketune kee jee Corintiou huéiye ínel bat ín eäka bënasi, Diosta bíchäpone ín jiápsipo huitti enchim tejhua; bueituk enchim ín jiokolë béchïbone; të kaa ä junëlituk, ín jiápsine ára nenka. ²⁴ Katte úttiapo ito bétuk enchim an-ïa Cristota sualhuäpo, ál-late enchim aniabareka aane, bueituk Diostat ehuäpo kutti jäbueka; enchim al-lenakë béchïbo.

2 ¹ Íaribéchïbo enchimneu ín huëpo kane júchi enchim

siroktua báare. ²Bueituk ínapo enchim siroktuakátek, huanáisu, ¿jábesu nee al-leetuanake jáni? Al-la emée jíbba, jume ín siroktuakáhui. ³Juári béchibone enchimneu jiojtek, bueituk enchimeu yepsakátek kaa sirokhuamta bit béchibo, huáme nee al-letua máchimmaki. Bueituk huittine enchimmet eiya juka ín al-leäu, emem simetaka ínomak ä attiak. ⁴Bueituk enchimneu jiojtekä, tüisi jiokot eiya entok jíápsipo kaa pappeakane yún opoakay; të kaa enchim sirok iaka, ál-la enchim jüenakë béchibo jachin tüisi enchim ín nakéhui.

Pablo kaa tüisi ayukamta jiokörek

⁵Të jábe nee siroktuakame, kaa nee jíba siroktuala, ál-la simem enchim kétchi, kaa yún nokbáahuäpo, júnelne jiaahua, “kaa yún nokbáahuäpo”, kaa kuttílasi nok báreka. ⁶Íri jabetat kutti nokhuakame enchim bétana hueeka, türi beja yúmalasi taahua. ⁷Én entok emée ä bej-reka kat eaka, chë júnaksanem ä jíapsi yechaka ä jioköripo yúmala, bueituk kaa uttesi ä sirok múknakë béchibo. ⁸Juári béchibone eláka ínel enchimneu jiaahua áapöríkem jünetua enchim ä nake bétana. ⁹Bueitukne ket iari béchibo enchimneu jiojtek, lutüriapo jípubareka simeku enchim sayhuakapo áman enchim anéhui. ¹⁰Én entok, juka jábeta enchim jioköreu, ínapo kétchi. Bueituk ínëli ket jita jiokörimachiku, ínapone ket juka

jiokorihuamta jioköre, enchim béchibone íkái johua, Cristota bíchäpo, ¹¹juka Satanásta kaa itom kobanakë béchibo; bueitukte tüisi jüneiya ára yore ä jioptuáhui.

Pueblo Troaspo Pablota kaa yanti äähui

¹²Buere joära Troaspo nee yepsako Cristota evangelio nok báreka, puertam étaporim jípureka junne Señorta bétana. ¹³In espírituone kaa yanti eiya ín hermano Titota kaa ín teaka béchibo. Chúkula, sika huépatne simem tebotuasuka Macedonia buiärau bíchaane siika.

Cristopo yöhuame

¹⁴Chëte Diosta baísahue, juka jíba yölataka itom hueriamta Cristo Jesúspo entok itom huam ámani simë kätanate ä jüneriatebo, juka musäla jubäpo ä täyahuamta. ¹⁵Bueituk Diosta béchibo entok Cristota ára jita joäpo, emo jinëulammechi áa béchibo musäla juuba, të jume emo tärume béchibo. ¹⁶Lüturiapom kókkö jubba, kokköna béchibo; të huamey béchibo entok jü jíapsihuame jíapsi béchibo. Iäri béchibo entok, ¿jábesu yúmalasi au jípure? ¹⁷Bueitukte kaa jume juebenam benna jume tomi yöhuäpo Diosta noki tekipuaname, katte huatem bénasi ä kujaktia, ál-late Diosta bétana jíápsipo kayta esolataka; Diosta bíchäpote Cristota bétana nooka.

Bemela nokta nau tütehuäpo ministrom

3 ¹¿Jachute júchi itom naatëpo ito bétana jíba

buéresi tüsi noknake? ¿Ö të ä jípüpo yúmala huatem bénasi, cartata tülisi ito bétana nokamta enchim béchïbo, ö enchim tüisi ito bétana noknakëhui? ²Emem itom cartam, itom jiápsipo jïojteri, inëlite täyahua carta letrapo, entokte sime yoremem ä nooka. ³Cristota cartatakem täyahua, ito bétana jïojtetaka, kaa tintayi, ál-la Dios jiápsamta espírituyi; të kaa teta tablapo, ál-la takahua tabla jiápsipo.

⁴Entokte huitti at ehuamta jípure Cristota huämi Diostau bíchaa. ⁵Katte itom jita täya béchïbo áma yúmahuamta jípure, bueïtuk huam jita täyahuäpo itom ä attiakä bénasi ehuäpo, ál-la jü itom áma yúmähui Diosta bétana huéiye. ⁶Áapo ínëli itom yahuak, ministerio tekil áma yúmahuäpo, bemela nokta nau tütehuäpo, kaa letrampo, ál-la espíritu; bueïtuk jü leyta letra yore súhua, të jü espíritu jiápsihumta yore makka.

⁷Entok jü ministerio kókkohuame letrammey tetapo jïojtehuak, uyjóriata jípurey, ä inëlipö jume Israelita usiarim karam Moiséjta pújbat bitchay, tösali machiriata ä jípurey béchïbo, ïri entok lütiseka hueiyey, ⁸¿jatchu kaa chë simek béppa uyjóriata jípure jäni, jü Espíritu Santopo ministerio? ⁹Bueïtuk jü ministerio bette nokpo chupeme, simek béppa uyjóriata jípureyi, të jachu kaa chë júne simek béppa uyjóriata jipunake jü ministerio lútula jiápsihumta itom makame. ¹⁰Bueïtuk huäri simek béppa uyjóriata hueriähui,

imï huam ä bithuäpo kaa al-lëbenna, bueïtuk chë júne simek béppa uyjóri jü chúkula hueme. ¹¹Bueïtuk jü lütinakeme uyjóriata hueriay, jü jíbapo béchïbotunakeme chë junne.

¹²Ën entok juka böbithumta jípureka, kaytatte jachin eäka huithuitti nooka. ¹³Entok kaa Moiséjta pújbat ahuä patpatiy bénasi, jume Israelita usiarim kaa ä bínnakë béchïbo, juka huemta, kaitäpo tahuasemta. ¹⁴Të jü bem koba suahua námakaka taahuak, bueïtuk én tahuariu tajti, juka Moiséjta ley nokta nokhuayo, jü puj pattiria bem jipurëu ámet óreka taahua, íkai entok Cristo kaitäpo ä tahuariak.

¹⁵Entok ketune ëni ïri tahuariu tajti, jüka Moiséjta Ley nokhuayo, jü velo bem jíapsi béppa órek.

¹⁶Të Señortau bíchaa emo jíapsi kuaktiakätek, jü bem puj pattiriata ukhuatuna. ¹⁷Bueïtuk áapo jü Señor Espíritu; entok jü Señorta Espíritu anëpo, sime guoytiari aayuk. ¹⁸Itapo simetaka ïari béchïbo, ito pujba étapolataka ä bícha, espejopo bénasi jüka Señorta simek béppa uyjóriata, simek béppa uyjóriapote bemelasi johua, ä alëbenatuhuäpo, juka Señorta Espíritu.

4 ¹Ëriaribéchïbo itapo íkai ministeriöta jípureka, nak jiokolihumta mabet-lataka katte kom eiya. ²Entok juka esotatë tiusi machik kaa jobare, kabetate baítattähuaka ito buériale, entokte juka Diosta nooki kaa täbuiasi huatem majtia, ál-la juka lutüriapo täyahumta jíbba, sëmëm bétana

ito jüneriateboka Diosta bíchäpo. ³Jü itom evangelio éсотaka órek, entok jíba anéli órek jume emo tárulame béchíbo. ⁴Imechiri, jü diablo ániat au díos joame, jume Diosta kaa súaleme koba suahuäpo am puj pattiak, bueituk jü Cristota evangelio símek béppa ujyorika kaa am machirianaké béchíbo; áapo entok Diosta jíápsäpo tua alébenna. ⁵Bueitukte kaa itapo ito nokriabareka nooka, ál-la Jesucristota Señorpo, ítapote entok enchimmeu tekipanuaareom Bénasi, Jesústa itom naké béchíbo. ⁶Bueituk Díos nesahuek, jum kaa machiku machiriata ayunaké béchíbo, áapo itom jíápsim machiriakame, bueituk íri machiria lutüriapo at jünehuamta täya béchíbo, juka Diosta bétana símek béppa ujyorik, Jesucristota pujbäpo.

Diostat ehuäpo jíápsihuame

⁷Íkäi buere bejremtate jípure babu báasompo imey báasom entokte itapo, bueituk jü huéchiapo yúmalasi uttiära Diosta bétana huéiye të kaa ito bétana. ⁸Símekutte jìokot aane, tëte kaa kom eiya, námuksite ito bitcha, tëte kaa amay ito huiike. ⁹Jájjuhuaka junne tëte kaa itapola aane, huattilatata junne tëte ketune jíápsa. ¹⁰Jíbate síme kätana takahuat ä huéria juka Jesústa mukukähui, bueituk kétchi juka Jesústa jíápsau itom takahuammet ä binná béchíbo. ¹¹Bueituk itapo jíápsame, jíbate kókko bareka ito toijla Jesústa béchíbo, bueituk kétchi jü

Jesústa jíápsäu itot bittunake itom takahua ára mukemtachi. ¹²Íaribéchíbo jü kókko huame itot aane, enchimmet entok jü jíápsihuame.

¹³Të Diostat ehuäpo Espíritu Santopo áabenak jípureka, ä: “Jìojteri Bénasi anä sualek, huäri béchíbone nooka”; ítapote ket ä sualek, iäribéchíbote ket nookak. ¹⁴Jünéaka juka Señor Jesústa jìabitetuakame, itom ket Jesustamak jìabitetuanake, entok itom áamak yeu jäbuanake enchimmaki. ¹⁵Bueitukte íkäi símeta joaka jìokot aane, enchim ito naké béchíbo, bueituk jü Diosta tühua juebénasi au бүрurianake, entok ínëli jü Diosta tühua johuame juebenanake Diosta ay úttil béchíbo.

¹⁶Júnentaka júnete kaa kom eiya, elaposu íri itom béppa takahua lütiseka huéiye, të jü huaijhua itom takahua chikiti táapo bemelasi tahuasime. ¹⁷Bueituk íri chubala jìokot itom anëhui, itot ä johua juka jíbapo béchíbo yúmalasi hueka béttesi símek béppa ujyorik. ¹⁸Juka bíthuäpo ayukamtate kaa bít báanake, të juka kaa bít-huamta ál-la; bueituk jü bíthuäka ayukame chubala jíbatunake, të jü kaa bithuäka ayukame jíbapo béchíbotunake.

5 ¹Bueituk jüneate íkäi itom takahua imí buíapo kaa bínnhuatunakemta juka karita én itom áma anëpo ä mójakteko, Diosta bétanate jóata jípure, kaa mamammey yáata, téhuekapo jíbäpo béchíbo. ²Imí joakate

ujbuana jikot eäka, tehuekau joata itom jípureü yaij péaka; ³inélite supetuataka bittunake kaa jujünélaka. ⁴Bueituk ínëli kétchi, jume imi takahuäpo chubala imi jíápsame, jikot eäkate ujbuanna; kaa jujünélaka taahua péaka, ál-la nat béppa supetuataka, bueituk iri takahua én itom jipurehui jü bemelasi jíápsihuame kaitäpo ä nünake. ⁵Entok Dios fári béchïbo itom yáakame, juka Espiritu Santota itom makkak ä lütüriatunakë béchïbo juka itom ä mak-rokähui.

⁶Bueituk inélite jíba huitti eäka jíápsa, entok jünéaka imi takahuäpo itom aneu tajti, mekkate señortau aane, ⁷bueituk at eäkate imi naa kaate kaa pusimnea ä bíchaka. ⁸Tëte át eiya, itom takahua tösaka péaka, Señortamak an béchïbo ⁹tëte ínën ket ä jobáare, áamak aneka entok kaa áamak aneka junne, ä eä pamante aneka jíápsibare. ¹⁰Bueituk úttia itapo simetaka Cristota yäura bíchäpo itom yeu jáptenakëhui, huehuëpulaka ä mabetnake juka bem yáakähui, takahuäpo aneka juka türik ö juka kaa türik.

*Tékil ministerio Diostamak
au tütehuame*

¹¹Jüneaka juka Señorta yörihuähui, yorememte Diosta bem mabetnakëu majtia, të jü jáchin itom jíápsau Diostau maachi, entok ínëline ket eiya. Enchimte ket itom täya machile. ¹²Juka türik ito bétana huetate kaa júchi enchimmak ettejoa,

ál-late enchim ito bétana ä jípu-ia juka tü ehuamta, bueituk jume emo jabeleka kaa huitti eäka jíápsame emem ára am yommianake. ¹³Bueituk itapo rokomtukäteko Diosta béchïbote rookom, të enchim béchïbo suamsi ito nüye katte rorokom. ¹⁴Bueituk Cristota yore nákéhui itom jíápsi yüe, íkai eäka itom jünériähui: huepuläka simem béchïbo múkuk, të juári béchïbo simetakam kókkok. ¹⁵Cristo entok simem béchïbo múkuk, bueituk jume jíápsame, bejam kaa bempo béchïbo jíápsinake, ál-la hua mukuka jibitekamta béchïbo. ¹⁶Inentaka én bat bíchaa itom takaapo kabetate täya, Tëte itom huakajpo Cristota täyakätek junne, ente ínëli huamte kaa ä täya. ¹⁷Ínëli jabetaka junne Cristopo aneme, beméla úsiari, jü örataka jak ayukaihui amáu tahuak én entok sime bemelasi yáari.

¹⁸Én entok sime iri Diosta bétana hueíye, áamak ito tütehuamta itom makkak Cristota huämi, entok Diostamak au tütehua tekilta itom makkak. ¹⁹Dios, Cristotat aaney jume ániat jíápsame áamak tütey, jume yoremem kaa türik bem yáalaü kaa ámet naïkiak, entok juka nokta áamak tütehuamta itom tekil makkak. ²⁰Inélite Cristota téhuampo nesauta joaka naa rejte, bueituk Dios jume huatemmeu ujbuaname bénasi ito huämi, enchimmeute ujbuanna Cristota téhuampo: Dióstamakem emo tüte. ²¹Áapo kaa ä yauhuak

juka kaa türik, të ito béchïbo kaa türiku naïkiahuak, bueïtuk itapo jum lútula jíapsihuäpo naïkiahuak, áporikuchi.

6 ¹Înëli itapo, juka tékilta ámak joaka, kuttílasite enchimneu nooka juka Diosta tühua kaa kia kaitäpo enchim mabetnakë béchïbo. ²Bueïtuk ínel jiaahua:

Aniata yanti tahualatukne enchi jikkajak;
entok jü jinëuria taahuaritne enchi aniak.

Ëni ajäria jü ára amä jehuiteterianakëhui; ëni ajäria jü jinëuria taahuari.

³Juka kaa türikte kaabeta itot bit ia ä jïopnakë béchïbo, bueïtuk jü itom ministerio tekiltat kaa juënak at nok iaka. ⁴Al-late türik juaka ito bittebo jum símeku Diosta ministerio tékilta joaka, juebénasi yanti ito nüyeka, jiokot emo bit-huäpo, kayta jipuhuäpo, entok jiokot eehuäpo. ⁵Yore bebiahuäpo, carcelimpo, juebena genteta chayë násuku, tekipanuhuäpo, yetem jípuhuäpo, entok ayunahuäpo. ⁶Chïcha machik kaa jipuhuäpo, yun jítat tüisi júnehuäpo, yore jiokolihuäpo, kaa bettek jíapsihuäpo, Espiritu Santopo, entok huitti emo nakhuäpo. ⁷Lütüria nokpo, Diosta úttiärapo, lutülay ára ai nassuhuäpo, batatana entok mikkotana. ⁸Úttíluhäka entok kaa tüisi ito bétana nokhuäpo emo úttíluhäpo, emo buérialihuäpo entok kaa emo buérialihuäpo; yore baítattähuame bénasi të lütüriapo joaka. ⁹Kaa täyahuame

bénaka, të tüisi täyahuaka; abe kókko me bénaka tëte ketune jíápsa, kókosi johuaka tëte kee kókko. ¹⁰Sírokamta bénaka, të jíba al-leaka, pobem bénaka tëte juebenam rikotela, kayta jipuremta bénaka tëte símeta jípure.

¹¹Cristota súaleme Corintiopo joome enchimneu bíchaa itom teni au étapola; entok itom jíapsi bueürusi ayula. ¹²Itapote chikti itom jíapsimakte kayta yeu bëaka enchim nakkë, të emëe enchim jíápsipo itou bíchaa emoem ampöle. ¹³Bueïtuk nanancha ä innë béchïbo, itom ito nakëhui, usiaritau nonokhuä bénasine enchimneu nooka, emem ket emo jíapsi étapo.

Itapote Dios jíápsamta teöpo

¹⁴Katem ámemak puaktia báare jume Diosta kaa yöremmaki, ¿bueïtuk jü kaa türik joame jachisu au jaläinake jü lütüriata joamtamaki? ¿Entok jachisu jü kaa machiriatamak áu türinake jü machiria? ¹⁵¿Jachisu, Cristo diablotamak au türinake? ¿Entok jü Cristota súaleme jü kaa ä sualemamaki? ¹⁶¿Jachisum nau türinake Jü Diosta teöpo, jume ídolommaki? Bueïtuk emëe Dios jíápsamta teöpöem, Diosta jiaka bénasi:

Ámemakne aneka ámemak naa huenake,
entokne amebéchïbo
Diostunake,

bempo entok ín pueplotunake.
¹⁷Íaribéchïbo ket júneli jiaahua jü Señor:

Ámenásukem yeu kaate,
éntokem emo naïkimte;
éntokem jü jaiti machikut kaa
mamma.

Huanäine ínapo enchim
mabetnake

¹⁸ huanäine enchim béchïbo
achaytunake,
huanäi emëe ín üusimtunake,
entok ín malamtunake,
tï jiaahua jü Señor simeku
úttiakame.

7 ¹Én entok emëe nakhuame,
jukaï bobithuamta jípureka,
takahuat entok espiritut chïcha
machik itot ayukamta bétanate ito
tüterianake, juka Diosta béchïbo
jíba santosi jípsihuamtate
yúmalasi jípunake, Diosta
majhuëka ä yörihuäpo.

*Pablota tüisi al-lëahui corintiom
jípsi kuaktekä béchïbo*

²Tü ehuäpem itom mabeta:
bueitukte kaa türik kaabetau
yáala, kaabetate juénaku au
nasontetuak, entokte kaabeta
baïtaula. ³Kanne bettek
enchimneu nok báreka nooka;
bueitukne bannataka béja enchim
ä tejhuasula, ín jíápsipo enchim ín
jípurëhui itom jíápsäpo entok itom
nau kókköpo. ⁴Kanne tihueka
enchimneu huitti nooka. Entokne
enchim bétana tüisi buere al-leiya,
jípsi yejtehuamtane yúmalasi
jípure, entokne yúmalasi ä jípure
juka al-lehuamta, jïokot anhuäpo
junne.

⁵Bueituk Macedonia buiaräu
yajaka naateka, itom takahua
kaa jimyoreriata jípurek, ál-late
simeku jïokot eetuasuahuak,

päkutana bétana nau nassuahuäpo
entok huaijhua bétana entok
majhuëka jïokot aaney. ⁶Të Dios
jume jïokot eäka ä bétuk emo
nüyeme jípsi yechame, itom
jípsi yetchak Titota itou yepsako.
⁷Entok kaa itou ä yepsaka béchïbo
jíbba, ál-la kétchi jum jípsi
yejtehuäpo enchim bétana ä jípsi
yechahuakapo, entok ket itom
ä tejhuak juka tüisi nee nákeka
ino béchïbo enchim buanähui.
Huanäine ïari béchïbo chë júne
al-lëiak.

⁸Elaposune huäri cartai enchim
siroktuak, të én kanne jachin eiya,
bueituk júnaköi jïokot jiaka junne,
huäri carta chubala jíba enchim
siroktuak, ⁹tëne én al-leiya,
kaa enchim sirok tuahuaka
béchïbo jíbba, ál-la, sirok huäpo
enchim jípsi kuakteka béchïbo;
bueitukem Diosta bétana
siroktuahuäk, ínëli, imi huäm
kayta enchim tarunakë béchïbo.

¹⁰Bueituk jü Diosta bétana
sirokhuae, jípsi kuaktihuamta
yore makka, jinëuriata béchïbo,
ïari bétanate kara täbuiasi eiya, të
jü ániapo kia sirokhuae, kókkö
huamta huéria. ¹¹Bueituk ínëli
Diosta enchim siroktuakäpo, jita
tü eerita enchimneu yauhuak,
jachisem emo aniak jum kachin
anmáchiku, enchim majhuë
násukem yore nakhuamtem nee
makkak, entok juka enchim
naïbukëhuem tüteka tüisi
tahuariak, bueituk inëlem jum
simeku chïcha machik kaa
jípureka taahuak. ¹²Bueituk
ïri enchimneu ín jïojtekähui,
kaa juka kaa türik yakamta

bétana hueiye, entok juka kókosi yahuakamta bétana junne, ál-la, Diosta bíchäpo, ä jünerianä béchibo, juka tü eerita ito béchibo enchim jípurèhui. ¹³Īari béchibote jíapsi joahuak jü enchim jíapsi yejteriayi.

Tëte chë júne al-leíya juka Titota al-lea béchibo, bueituk ä espíritupo oúsi ehuamta enchim ä makaka béchibo. ¹⁴Enchim bétanane ino úttisulataka kanne tiusi tahuala, bueituk síme ĩaribétanate lútüriata nok-la, entok kétchi jü Titota bétana itom ito úttilekäu lútüriataka taahuak. ¹⁵Áapo chë júne enchim nakkë, enchimneu huateka jachin símetaka enchim ä nok jikkajakä béchibo, entok jachin Diosta yörihuäpo emo yoaka enchim ä mabetakä béchibo. ¹⁶Al-leane símeku enchimmet huitti äaka.

*Cristota súaleme béchibo
tomi nau toijhuame*

8 ¹Ínëli kétchi hermanom, enchimtä tejhua juka Diosta tu eäu Cristota sualhuäpo nau anim makhuakahui jum Macedonia buiärapo. ²Bueituk jiokot ámeu huë násuk junne, jü símek béppa bem al-leahui entok polobemtaka junne, rikosi jita jipuhüä bénasim kaa emo jiokorek. ³Bueituknä jüneriatebo, juka tomita Diostau bíchaa naikiata al-leaka úttiärata bem jípurëpo ámani, entok chë junne bem úttiära áma yumä béppa. ⁴Bempom juebénasi itou ä aahuak juka al-lehuamta Diosta bíchäpo jipurokaka, jume Cristota

sualhuäpo aniabaahuäpo. ⁵Entok kaa itomä boobichä pámani, ál-lam Señorta mambo bat emo tojaka ofrendapo, chúkula entok itom aniahuäpo Diosta äa pámani. ⁶Īari béchibote Titotau kuttílasi nookak, bueituk jachin bannataka ä naatekä pámani, ínëli kétchi enchim násuk ä chupa sahueka, juka Diosta tühua tékilta. ⁷Ínëli kétchi, emëe símekuchem Diostat ehuamta yún jípure, nokta nokhuäpo, jita täyahuäpo, entok símekuchem kaa bettek jíapseka ára jita johua, entok enchim itom nakepo, íkai tomita Diostau bíchaa naikiata entok Diosta tü eäu yünem ä jípure.

⁸Kanne nesahuemta bénasi nooka, ál-la ä jüabila béchibo, jume huatem ára jita joäpámani, entok kétchi jü yore nakhuamta kayta esoka enchim jípurèhui. ⁹Emem béja ä täya, juka Diosta tühua itom Señor Jesucristota jípurèhui, bueituk itom ä nakë béchibo poobetaka taahuak, rikotaka junne, bueituk emëe ä pooberayi rikotukäem.

¹⁰Entok iayirine consejota enchim makka, bueituk ĩri enchimneu türi, jume bannataka naateka, kaa ä joaka jíbba, ál-la ket ä huatiaka, ĩebu huasuktiay naateka. ¹¹Én entok kétchi akem ä yáa báreka eíya, bueituk jachin lautí enchim ä huatiakä pámani, ínëlem ket ára ä chuppa ä yábahuä pámani enchim áma yumäpo. ¹²Të tua batchu jü ínëli ehuäpo ayuka yabahuame, ára yáatu áma yúmahuä pámani, të kaa áma yúmahuäpo äe.

¹³Tëne kaa íkái nooka, huatem yún jita jipunakë béchïbo, enchim entok kaa kayta jípunakë béchïbo.

¹⁴Ál-la imechï taahuarimmet jü naarekik jípubahuäpo, jü yún enchim jita jipurëpem bempörim ára ania, bueítuk chúkula enchimneu jita bëyei bempom yún jita jípurëtek ára enchim ania, ínëli jü nanäla ehuame enchimmet ayunake.

¹⁵Jïojterita jia Bénasi: “Jü yún jita toboktiakame, kaa yún ä jípurek, të jü chë ilikkik toboktiakame, kaa chë ilikkik jípurek.”

Tito entok jume ä jaläim

¹⁶Të Diostate baísahue Titota ä jíápsipo enchimneu tü ehuamta ä jípurekä béchïbo ket jíba ino Bénasi.

¹⁷Të lútüriapo nokta mabetak ä tutürek, bueítuk tuísi enchimneu bíchaa tü eäka, ínëli siika enchimneu bíchaa ínel ä eäpo.

¹⁸Entokte senu hermanota áamak áman bíttuak, iari bétana jü tuísi nokhuame síme Cristota sualhuäpo nau animmet jikkaijtu.

¹⁹Të kaa íri jíbba, ál-la ket jume iglesiam bétana ä tekia makhuak itomak ä huenakë béchïbo enchimneu bíchaa itom katëpo, juka itom nau tojakäu enchimneu hueriu béchïbo; të íri ministerio tekil itom joäu Señorta jíba úttil béchïbota johua, entok enchim tü eäu jünerializebö béchïbo.

²⁰Kaabetate kaa türík itot nok-ia, juka juebenak nau toijhuakamtat itom tekipanüä bétana. ²¹Juka lútula huemtate jobareka eíya, kaa Señorta bíchäpo jíbba, ál-la ket jume yoremem bíchäpo.

²²Kette ámemak áman ä bíttuak juka itom hermano, juka tü ehuamta juebenak bétana ä jípureüte juebénasi ä bil-la, të én entok chë junne, jü tü ehuame at aika, enchimmet tuísi huitti ä eä béchïbo. ²³Të Titota bétana, ínapone ä jalaëk entok nee aniaka tekipanua enchim béchïbo, entok itom hermanom bétana, cartata bem hueriäpom Cristota sualhuäpo nau anim bétanam aman bittuari Cristota looria béchïbo. ²⁴Bempörimem jünetua, Cristota sualhuäpo nau anim bíchäpo, juka enchim am nakëhui entok juka huitti enchimmet itom ito úttilëhui.

Jü tomi nau toijhuame hermanom béchïbo

9 ¹Jume Cristota súaleme béchïbo nau toijhuamta tékil bétana, kanne éntok enchimneu jïojtenake türi bejja. ²Bueítuk juka enchim tü eäune täya, ínëline enchim bétana0020tü eäka entok al-leaka Macedonia buiärapo anemneu nooka, bueítuk jume Acaya buiärapo joomem iebo naateka huechiampom emo jípure; ínëli jume huate enchim jüneriakam ä innëak juka huatem aniabahuamta. ³Tëne jume hermanom enchimneu bittuala, bueítuk jü enchim bétana tuísi huëpo itom jünereaü, kaa kia bejatunake; të ál-la ín jáä Bénasi, huechiapem emo jípunake.

⁴Jachinaik huate macedoniom ínomak äbo sajakätek, enchim kaa huéchiapo anemem teunake, huanäite tiusi tahuanake, huitti

ehuamta enchimmet ito jípurë béchïbo, të jü tiusi máchira kaa ito béchïbo ál-la enchim béchïbotunake. ⁵Ínëli, úttiatak kuttílasi hermanommeu ín noknakëhui, enchimmet bat am kannakë béchïbo, entok bannatka juka huatem aniahuamta bétana enchim nokakaü, huéchiapo bat enchim emo jípunakëhui, bueituk kaa úttiapo námakak jiapseka enchim nahuä toijnakë béchïbo juka huatem ai enchim anianakëhui.

⁶Tëne ínen ket jiaahua: Jü kaa jaikik echákame, ket kaa jaikik toboktianake; të jü yún echákame, ket yún jichupata toboktianake.

⁷Hueëpulakam jíápsipo bem nenki báreka eäu nenkinake; të kaa ä beutireka, entok kaa úttiapo bénasi, bueituk Dios ä nakke juka al-leaka, Diostau tomita buisemta. ⁸Entok Dios úttiata jípure, enchimmet ä bürurianakë béchïbo juka Áapörik tühua, jum ínëli bithuäpo, jibem símeku yúmalasi jita jípunake entok kayta enchimmet bínake jum tühuaata johuäpo. ⁹Ä jiojteri bénasi:

Ä naïkimtek, póobem miikak, jü lútula jita ä joáu, jíbapo béchïbo órek.

¹⁰Entok hua Dios báchiata et-baremta makame, entok juka jïbuamta paanim, ínëli yore miknake entok ä bürurianake juka ethuakamta, entok juka chupuka takamta bürurianake, lútula enchim jita joapo. ¹¹Bueituk ínëlem símeku rikomtunake huanärem kaa emo ámpöleka yún huatem ára anianake, iri itot ä

johua juka Diosta bäisaihuähui.

¹²Bueituk iri ministerio tékkil johuame, kaa juka Cristota sualemmeu bëyemta jíba johua, ál-la ket áma juebenna jü Diosta bäisahueka itom anëhui.

¹³Bueituk íkái ministerio tékilta bíchakam Diostam úttilnake, juka Cristota evangelio nesahui enchim joä tiaka, entok kaa emo ámpöleka enchim am aníaka béchïbo, bempörim entok símem.

¹⁴Ínëli këtchi juka oraciónta bempörim joäpo enchim béchïbo, enchimmet nakke, juka Diosta tühua juebenak béppa enchimmet ayukä béchïbo. ¹⁵Diostate baisahue, símek béppa yörisi machik itom ä makaka béchïbo!

Pablo nok naksua ä ministerio tekil béchïbo

10 ¹Ínapo Pablo enchimmet ujbuanna Cristota úttesi yore nake pámani, bueituk enchimmet anëtekne kaa jikat eäka tülisi nonoka, të kaa enchimmet anëtek entokne kuttílasi enchimmet nonoka. ²Huittine enchim tejhua, enchimmet anëtekne kaa kuttílasi enchimmet nok báare, íkái kuttilla noktane huitti nok báreka eýya, jume kaa türik itom joä tiammehui. ³Lütüriapote takahuäpo aneka jíápsa, tëte kaa juka takahuata huaatiaü johua. ⁴Bueituk jum nassuahuäpo ai itom ito aniähui katim imi ániapo joome, ál-la Diosta uttiarapo hueiye, bueituk juka buéresi úttiaka órekamta kaitäpo tahuaria béchïbo. ⁵Juka

nokta huëpo Diosta bej-reka jikau au cháalata kom tatap béchïbo, huanäi juka sïme éerita Cristota nesahui jobahuäpo ä hueriu béchïbo. ⁶Éntokte ínël jü kaa tüisi anhuamtat kutti nokbare, juka Diosta nesahui yúmalsi enchim joayo.

⁷Juka bithuamtem at suaka ä bitcha. Bueituk jábe ä jiasipo Cristota au jípurë tíame, íkái ehuamta ket jípunake, jachin jábe Cristotat áu anë tíame, bueituk ítapote ket anëli Cristotat aane. ⁸Elaposune chë júne ino úttile, jum yäura úttiata ín jípurëpo, ikári jü Señor itom ä mak-la enchim ái itom yötutuanakë béchïbo, të kaa kaitäpo ai enchim itom bínnakë béchïbo, ïari béchïbo kaibune ái tiunake. ⁹Bueituk kaa täbuiasi bittunake, ín jïojterimmea enchim majtuam tenasi. ¹⁰Bueituk lütüriapo huate ínël jiaahua, jume cartam úttia entok kuttílasim nooka, të áapo áma anëtek kaa kuttílasim nooka, ä nokaü entok kaa sualmatchi. ¹¹Íkaine ä jüneria-ïa juka nokakamta, jachin juka cartapo itom nokä bénasi, kaa áma aneka entok áma aneka junne, juka yáa baahuamtate yáanake.

¹²Bueituk katte huatem bénasi ito nübareka eíya, entokte kaa áme bénasi ito jikau chatcha báare; bueituk bempom bempolaka nau emo jujünakte, entokim nanancha emo bíchaka kaa sua eíya. ¹³Të itapo katte kia jájana ito úttil báanake, ál-la juka jünakterita Diosta yechaläpo ámani, bueituk ínël enchim

yaij béchïbo. ¹⁴Katte chë béppa ito eria, kaa enchimueu yaijlamta bénasi, bueituk ítapote bat echimueu yájjak juka Cristota evangelio hueriaka. ¹⁵Katte täbuiik tékilta johuäpo chë júne ito úttil báare, ál-la juka Diostat eäka enchim yöotu pámani, enchim násukte úttilhuaka binná, juka jünakterita itom jípurë pámani. ¹⁶Éntokte sïme kätana juka evangeliota huatemueu nooka, enchim anëpo chë huannabo, kaa täbuiik tekipanuälapo kikkimuka, kaa täbuiik tekilpo ito úttil báreka.

¹⁷Të jü au úttileme, Señorpo au úttilnake. ¹⁸Bueituk jü apola au jikau chatchame Dios kaybu ä úttilnake, të jü Diosta úttileü ál-la.

*Pablo entok jume apóstolim
ára nokichim*

11 ¹Ili rokosi nee anëpem nee jìokorekätek türefyey, ä ínëlituk jehuitëem. ²Bueitukne näibukeka, Diosta béchïbo enchim näibukke, bueitukne huépülak jíba enchim kunatua báare, bueitukne jamut bemeta bénasi Cristotau bíchaa enchim yeu jábua báare. ³Të jachin jü bakot ä arahuë páman Evata bätähuak, ínëli jü enchim innëau ára au nayote, jum enchim jíápsipo huitti eäka Cristota sáu enchim katëpo. ⁴Bueituk jábe itou yepsaka täbui Jesústa bétana itou nokäteko, jü enchim itom majtiakä béppa, entok kétchi eme juka espírituta enchim mabetakä béppa täbui espírituta mabetätek, entok täbui evangeliota enchim mabet-lä béppa, ä turiakä bénasem eäka

ä jehuitarua. ⁵Bueituk kaitäpone ino chë ilitchile, huamei buere apóstolim náapo. ⁶Eläposune in nokäpo, kaa tua tüisi huéchiapo nooka, jum jita täyahuäpo kaa junëli; bueituk simeku jum jita itom joäpote enchim ä jüneriatuala.

⁷¿Jachune kaa tüisi ayuk jäni simem betuk ino tahuariaka, enchim éntok jikat tahuariaka, bueitukne Diosta evangelio enchimneu nookak kayta enchimneu aahuaka? ⁸Huate iglesiam kaa tómeke tahuala nee ania báreka, ímëri nechim bejtuala enchim nee majtianakë béchibo. ⁹Jiokot eäka enchim násuk nee aneyo, kaabetaune jita áahuak, bueituk juka inou bëyemta, jume hermanom Macedoniapo joomem nechim aniak, simekutne ino suayak, entokne simeku ino suayanake, kaabetau kayta jita au béchibo. ¹⁰Cristota lutürria inot anë béchibo, kaabe nee ä úkhuanake juka yúmalasi in al-leähui jum Acaya buiärapo. ¹¹¿Jatchiaka? ¿Jachune kaa enchim nake, jäni? Dios jüneya enchim in nakëhui.

¹²Juka in joaüne jiba naburujti jobare, bueituk jume jítat júne jiahuiteka Diostat emo tekipanua tíame, katim emo ito benä tianake. ¹³Cristotahuim emo apóstolim tiaka, Diosta tekilpom tomi yö báreka, të ímëri katim Cristota apóstolim. ¹⁴Entok kara at guomtisi maachi, bueituk Satanás apöisu tua ángel machiriata bénasi áu sasankotua. ¹⁵Bueituk ínel ä huëpo kara át

jünnera eetu bueituk jume au tekipanuame kechim täbuiasi emo yáaka, lútüla emo tekipanua tiabare; ikäi tékilta bem joä pámani bette nooki ámet chupana.

Apóstol Pablota jiokot anëhui

¹⁶Júchine ínel jiaahua: káabe rokota bénasi nee jípunake; të emëe jíba íneli ino bétana eätek, rokota bénasem nee mabeta, ili ino úttil béchibo. ¹⁷Juka in nokähui, kanne Señorta eápáman ä nooka, bueituk roko ehüápáman hueíye. Jü in ino úttilëhui. ¹⁸Bueituk juebénakam huakajpo emo jábele, ínapone ket ino úttil báare. ¹⁹Bueituk eme susuakame jume rokosí emo nüyemmakem ára emo hueria, emëe suamsi emo nüyeme. ²⁰Bueituk jábeta úttiapo enchim tekipanuatua yo katem jijiale, entok jábeta enchimney tüisi tahuayo, entok jábeta jita enchim: üuhuayo, entok jábeta au jikau chatchayo, entok jábeta jopemmet enchim chonayo, yantem eäka ä bitcha. ²¹Inobéchibo tuisi maachi jiöbe jü in nokähui, tëte iäri bétana katte úttiata jípure.

Të jume huatem nokaka áma emo yumä teätek, ínapone ket áma yúma eläposu roko jeuhuey jü in nokähui. ²²¿Bempom hebreom? Ínapo kétchi, ¿israelitamme? Ínapo kétchi. ¿Abramta usiarimme? Ínapo kétchi. ²³¿Cristotahuim ministrom? Ínapo chë junne (rokota bénasi nee nooka); bueituk tékilta johuäpo, ínapo chë júne

tekipanuala; yore bebiahuäpo juebénasine bemmuchari chë áme béppa; carcelpo yore joahuäpo chë burusi; jinhua machiku abe yore suahuäpo juebénasine áma naa simla. ²⁴Judíom bétanane mamnisi ä mabet-la juka yore bebiahuamta, huépülak béchïbo kaa cuarentasi. ²⁵Baysine jibebiammey betmuchari, sejtulne tetammea mamaasuri. Baysine barcota roptey áma hueiyey, senu tukaapo entok senu taapone bahue násuk ansula barcota roptëpo. ²⁶Böommet boojohuäpo juebénasi; bathuempo jinhua machiku, lak-ronim násuku jinhua machiku, jum jinhua machiku jume judío naciompo ínomak joomem násuk, entok kaa judíom násuk jinhua machiku, buere joära násuk jinhua machiku, ánia see paria násuk jinhua machiku, bahue násuk jinhua machiku, jume emo hermanom tiaka kaa huitti jíápsame násuk jinhua machiku. ²⁷Lotteka tekipanuahüäpo, juebénasi kaa kothuäpo, juebénasi tebaureka, entok baímukhuäpo, juebénasi ayunahuäpo, joäsuhuäpo entok kaa sankohuäpo.

²⁸Ikäi simeta hue násuk, jü chikti táapo ínou yeu matchume, sime iglesiam bétanane obiseíya. ²⁹¿Bueítuk jábeta koköri huechek, ínapone ket koköri huehueche? Bueítuk jábeta jïoptuahuakne, kujti eäka kaa al-leaka tatahua. ³⁰In ino úttilnakeu ä úttiatur, inone úttilnake, kaa ín úttiakäpo. ³¹Jü ítom Señor Jesucristota Dios Atchay, jü yü-tütti al-lerita

attiakame, jüneiya kaa ín kia nokähui. ³²Bueítuk pueblo Damascopo nee aneyo, jü rey Aretastau gobernador jume damasenom buere joära suayay, nee buijtebo báreka. ³³Të barda bentanapone buere kanajtapo huannäbo kom yéchahuak, huanäine ínël ä mampo ino yeu huikek.

Huantiria takat innëhuame

12 ¹Lutüriapo ino béchïbo kaa türi ín ino jikau chatchähui, tëne juka ín bíchakähui entok juka Señorta inou yeu machiriakäi nokbare. ²Senu yoremrane Cristota sualhuäpo täya, bueítuk catorce huasuktiriam hueíye tehuekapo Diosta jíápsäpo jikau nóitiriahuak. Kanne jüneiya ä takahuäpo ö espíritupo; Dios jíba jüneiya. ³Entokne ä täya huakai yoremra, ä takahuäpo ö kaa ä takahuäpo, kanne jüneiya, Dios ál-la ä júnería. ⁴Tehueka paraisou ä nóitiriahuakahui, ímïri nokta jikkajak të ïri nooki entok kabemmeu ára noktu. ⁵Ïri yoremra bétanane ino úttile, të ino bétana entok kaitäpone ino úttil báare, ál-la jum kaa ín úttiakäpo. ⁶Të ínapo ino úttil báarëtek kaa kia béja eíyey jü ín nokähui, bueítukne lutüriapo nook eíyey, tëne ä tojja bueítuk kaabeta täbuiasi ino bétana eenakë béchïbo juka inot ä bichähui entok inot ä jikkajakähui.

⁷Bueítuk juka buéresi inou yeu machiriahuakamtay, kaa ino jabelnakë béchïbo, ín takahuat

huanteria huicha sósoria tenaka inou bittuari, Satanásta nesahui joame jopemmet nee chonamta bénasi. ⁸Īari bétanane Señortau baysi ä aüsula nee ä úhua sahueka. ⁹Të ápo ínel inou jiaahuak: “In tühua emobéchibo yúmala; bueítuk jü ín uttiära yúmalataka tatahua jum kaa úttiata ayukäpo.” Īaribéchibone tü eehuäpo ino úttinake, jum ín kaa úttiakäpo Cristota uttiära inot tahuanakë béchibo. ¹⁰Entok Cristota ín nakë béchibo ál-leane jum ín kaa úttiakäpo, kaitäpo bit-huaka junne, simeta inou bëye násuku, kaa tüisi bit-huaka, entok Cristota béchibo jikot anhuäpo. Bueítuk jum ín kaa úttiakäpone, chë úttiaka tatahua.

***Pablo obisi eiya Cristota
sualhuäpo nau anim
Corintiopo joomem béchibo***

¹¹Ino úttilekane kaa suakamta bénasi tatahua, të emëe úttiapem nee junëli ayutuak. Bueítuk ínapone enchim bétana úttil eehuay; bueítuk huámei buere apóstolim náapo kaitäpone yeu tatahua, eläposune kayta bejre. ¹²Sime juka apóstol señaltane enchim násuk yahuak yanti ino nüyeka, juka Diosta ára jita joähui entok jume milagrom, tua jüneriahuak ín apóstoltukähui. ¹³Bueítuk emëe jitäposem yeu tualala jume huatem Cristota sualhuäpo nau anim násuku, bueítuk ínapone kayta enchimneu áula enchim nee anianakë béchibo, jíkai ín kaa ammäli ayuri, nechem at jikore!

***Pablo am tejhua bajikun
huëpo ámeu yebijrokaka***

¹⁴Bajikun huëpone enchimneu huebáreka huéchiapo aane, bueítukne kaitäpo enchim muksi eetuanake enchimneu jita aahuaka. Juka enchim jípurëune kaa jaria, të enchim ál-la, jume usiarim katim áchayhuarim béchibo tomita nau toijnake, ál-la jume áchayhuarim bem üusim béchibo. ¹⁵Ínapone tüisi al-leaka juka ín jipurëu toijnake jita ái jinnü béchibo, entok eläposune ínapo áma ino lütia yore nakhuamta enchim jíapsim béchibo huatiaka, eläposune ínëli enchim nákeka, ínapo chë júne kaa nakna.

¹⁶Të jü enchim kaa ín obisi eetuähui, jü kayta enchimneu ín ahuai huitti jüneriahuaka jipuhuä, të huate nee buere machi tíiya jänitukne ín arahuëpo am baitähuaka jita am úkhuak.

¹⁷¿Jachune enchim baitaula jum jabeta enchimneu ín bíttuakäpo?

¹⁸Juebénasine Titotau ínel jiaahuak, áman enchimneu ä hue sahueka entokne áamak senu hermanota áman bíttuak. ¿Jachu Tito enchim baitähuak jáni? ¿Jachute kaa huepul espíritupo nau eiya, entok huepul huaraktiriapo?

¹⁹Jámakem enchimneu itom ito jikore téfey. Të kaa junëli; Diosta bíchäpo entok Cristota tehuampote nooka. Īri sime emo nakhuäpo hueíye, enchim áma yötunakë béchibo. ²⁰Jámakne kaa enchim ín teubarë bénasi

eäka sum eíya, entok jámak eme ket nee teunake të kaa enchim eä pámani. Bueítuk jámak enchim násuk ayuk jü enchim nau nok nassuähui, huatek attia jípupeehuame, juëna omtira, emo näikimtehuame, huatemet bettek nokhuame, juënakau au jabelhuame entok jájana emo nühuame. ²¹Entok enchimneu nee notteko, tiusi machikne Diosta bíchäpo innëna, entokne jáamak ket buannake, jume juebenak kaa türik joaka kaa emo jípsi kuaktiamë béchïbo entok jume chïcha machiku jíapsaka, jámutta kaa jubeka ámak jíapsame, entok kaa turik johuäpo jíapsaka junne.

*Huitti am tejhuakahui
entok teboteri ä luutëpo*

13 ¹Ëni bajikun hueíye jü enchimneu ín noitinakëhui. Juka enchim násuk kaa tüisi huëpo, guoyim o bajim bíchäpo simeta huitti tahuariatunake. ²Bannatakane ä noksula, én entokne júchi ínel jiaahua enchimmak anemta bénasi, én entokne kaa enchimmak aneka ámeu jïojte jume bannataka Diosta bejrim yáakammehui, entok sime jume huatemmehui, bueítuk júchi enchimneu yepsakätek kaabetane säbuilanake. ³Bueítukem ä jüneria báareka ä jaria, nee nokay Cristota inot anëhui, áapo entok enchim násuk kaabeta säbuila, ál-la enchimmet uttiata jípure. ⁴Eläposu kaa úttiakamta bénasi kúrusit poponhuak, Diosta utteara

béchïbo jíapsa. Alëbénasi ítapote ket kaa úutiak, tëte ámak jíapsa Diosta utteara itot anë béchïbo.

⁵Enchimechem nat suhua, jachem Diostat ehuäpo aane jáni; emoem jüneria enchim áma yumähui. ¿Ö katem emo täya, Jesucristota enchimmet anëhui, ö jamakem kaa áma yúmaka tatahua? ⁶Tëte jüneya enchim jünenakëhui, elapo júneriatunake itom ál-la ama yumähui. ⁷Entokte jíba Diostau enchim nok-ria, kaa türik kaa enchim yanake béchïbo; të íkái enchim joay katte itapo ito úttil-ia. Ál-la enchim juka türik jonákë béchïbo, eläposute itapo kaa áma yumamta benna. ⁸Karate jita johua lútüriata bej-reka huemta, të lútüriata béchïbo ál-la. ⁹Al-lehuamta jípure kaa itom uttiaka béchïbo, tëte enchim úttiata jipu-ia, entokte ketune Diostau enchim nok-ria yúmalasi Diostamak enchim jípsi-ia. ¹⁰Íari béchïbone enchimneu jïojte kaa enchimmak aneka, bueítuk enchimmak anëtek kaa kuttalak nok béchïbo, juka yaura uttiata Señorta nee mak-la pámani, íkäine mak-ri ai yötu béchïbo, të kaabeta kaitäpo ai tahuaria béchïbo.

¹¹Jum simeku hermanon, ál-leaëm, kayta áma bëyepem yúmalasi emo jípure, emoem jíapsi joiya, nanabeuchem eíya, éntokem yanti eäka jíapsa; huanäi jü Dios yanti ehuamta entok yore nakhuamta jípureme, enchimmak annake. ¹²Emóem tebotua Cristota sualhuäpo emo nakeka. ¹³Sime jume santosi jíapsame enchimim tebotua.

¹⁴Señor Jesucristota tü eäu, jü
Diesta yore nakëhui, entok Espíritu

Santota jiápsipo jipuhuame,
enchimmaktunake. Júnentunake.